

■ COLUMNA

# La gronda libertad – gnanc adina uschè simpel

DA FLAVIA HOBI

**T**ge – avain nus ussa schon la fin dal mais?» u «Quai è strusch da crair che questas emnas èn schon puspè vargadas...» Dètg segir enconuscha mintgin da nus quests muments cura ch'ins ha il sentiment ch'il temp varga bler memia spert. Schon sco uffant svanivan las grondas vacanzas da stad uschè svelts ch'ins vegniva tuttina mai da far tut quai ch'ins aveva prendì avant.

**P**er il mument sun jau studenta. Quai vul dir ch'jau sun fitg libra. Nus dastgan giudair pli che quatter emnas vacanzas adonn. Gea – jau hai vaira-main la pli gronda libertad ch'jau hai m'immaginà avant il cumenzament dal studi. Franc e segir na vegn jau mai pli ad esser uschè libra. Ma pudair parter en sez il temp n'è betg adina uschè simpel. Cura lavur jau? Cura emprend jau auter che curt avant ils examens? Cura scriv jau mias lavurs? Investesch jau memia pauc u memia bler temp en questas? E cura na fatsch jau simplamain nagut?

**P**udair parter en il temp dependa era fitg dals differents tips. Tscherts dovran pli blera structura, auters main. Structura po restrenscher, ma era dar ina tscherta stabilitad. Ina stabilitad che tscherts han gugent, gea ch'els dovran per



dumagnar lur mintgadi. Auters sa sentan tras ina structura forsa co en prashun. Atgnamain èsi in grond luxus sch'ins ha la pussaivladad da crear sez questa structura. Ma mintgatant giavischass jau tuttina ch'i vegniss cumandà dapli u silmain che quai sistem cun ils ECTS fiss in zic pli simpel.

**Q**uesta libertad po numnadamain era custar blera energia. Per exempel cun tschertgar ina piazza da vacanzas. Igl è enorm difficil da chattar ina piazza mo per in pèr emnas. Cler, tge fatschenta vul schon lavurar en insatgi per curt temp. Pli lev èsi da chattar ina piazza sco «springer» en in restaurant cun terrassa gronda da stad – era sch'ins ristga lura da mai pudair lavurar. Uschè po ina stad plain plievgia esser detg stentusa. E cura ch'ins vegn lura clamà da vegnir a lavurar han ins segir il pli grond stress. Chattar ina lavur sper il studi n'è era betg simpel.

Probabel lavuran ins lura praticamain mo las fin d'emnas – cura ch'ils auters han liber. Latiers vegn che sch'ins ha anc da far zunt bler per il studi, sco per exempel avant ils examens, vegni fitg dir. Tge è lura la dretga mesira tranter studiar, scriver lavurs, lavurar, suandar ses hobis e far vacanzas?

**P**robabel mintgin che sto chattà or quai per sasez. A tscherts gartegia quai meglier, auters dovran pli ditg. Co adina – il principal para a mai ch'ins posia s'intgant per insatge. Independent sche quai è il studi, la lavur dasperas u il hobi. Mia mamma di che quai ch'ins fa gugent, là èn ins era buns. Jau pens ch'è sch'ina persuna po sa fascinar per insatge è quai vairamain bel e tenor mia opiniun ha ella lura schon cuntanschì bler per esser ventiraivla.

**I**l temp da studi e las libertads ch'ins ha, è segir ina gronda pussaivladad per imprendier d'enconuscher meglier tge ch'è bun e mender per sasez e l'atgna moda da viver. Jau aud adina puspè ch'ins stoppia giudair quest temp. Il meglier fasch jau quai – il temp ch'ins è là vid la lavur cun paucas emnas da vacanzas vegn segir anc baud avunda. Dal rest po il temp da studi esser plain finamiras ch'ins lavura vidlonder – è tge datti pli bel ch'avair la schanza da realisar quests siemis.